

2 Pita

Teik pasi Pita liai hani teka kahikahi Jises Kraiss

Kakain ti haxewai teik pepa ie

Pita tel aposel tai teik pas ie hani teka kahikahi Kraiss ti tesol tesol lokon ti i toto tehu taon Rom. I sohot sai 34 ahang muhin ti Jises moih aliawa ape Haeu waxi i hani tesol tonan. Tek a kahikahi Kraiss ien, lato toto xux tesol tesol ti kilan seilon laha hahanau waliko tenen kumahe sawisawin sale Jises Kraiss. Pita hahongo lato ka kum sohosoh kakaialaha. Tek a seilon ien laha putini ka saun lialun se solian. Tin laha kaxi sasawateni ka Jises Kraiss kum aliama. Pita hanamena teka kahikahi Kraiss waliko tenen salan lehe lato tu xox tatele ti Jises Kraiss. I kaxi haxewa hani lato ka Haeu hataliamu aliai Jises Kraiss nake pahan wanen hatesol seilon towiahumua ti lialui woulaha ape laha sohoa ti Jises Kraiss.

1 ¹Teik pas ie tataiak nga Saimon Pita, tel aposel ma unau Jises Kraiss. Nga tai hani amuto teka hina namil xoxoan ti Jises Kraiss hanowi amite tesol aposel. Jises Kraiss tel Haeu ti kako ma awaiakako ti kawatan ti saun lialun, i hanamiloa kako ape kako soh tetan nake i tel sawisawin tapein.

²Nga kamei Haeu haxoxo tatele namilomuto ti pakata kapita kapin ma Jises tel Masiwi ti kako lehe Haeu kola hawane lalape soliaian hani amuto ma hatona hasolia tiamuto.

Kolawa ka kako kahikahi Kraiss wanen

³Kako papakata kapi Kraiss, aile ape ti puki pohen i hani kako lawe waliko ti hualiakako lehe totonakako i soli ma kako aile usi saun tetenen Haeu pahan. Lalape axan ma soliaian i itiniwen kako hani kahikahin. ⁴Nake ti tesol waliko ien, Haeu hani kako waliko pate tuah ti i kakawen ma kako pon saliniai lawe waliko lialun ti tehu pon ie tenen i ahuma ti isiai seilon. Ape woukako soli ahe tatele ma kako sohot seilon pate sawisawin hanowi i.

⁵Amuto soh ti Krai tuahe tin puas elieliwa ailei lawe waliko solian ma upia halapa ahekewa anesoin. ⁶Tahiwa isiamuto ti ailei saun lialun, kum leng kokosea, kum aile lilioi puasamuto kalak kawatan tunahi amuto ma kewa amuto unau Haeu wanen. ⁷Aile hasolia haniwa tel tel ti amuto ma kolawa saun ti wawahen haniwa lawe seilon. ⁸Na amuto aile tatale tesol waliko ien, anesoamuto ti Jises Krai tel Masiwi ti kako i lap ahe ape puasamuto kau hawane anan. ⁹Tuahe seilon teka laha tap tesol saun ien, laha masin seilon pulaxa, laha kum paxai tioi waliko tenen solian ma lialun. Laha maluhewen ka Haeu nuhi hauniwen laha ti lialui woulaha.

¹⁰Teka akikik ti Krai, puas eliel kolawa ka salan Haeu kilamiwen amuto seilon tetan ma amuto kahikahi Krai wanen. Na amuto aile ukek, amuto kum tale uke wanen tehitomuto hani Haeu. ¹¹Ape Haeu waxi amuke amuto hani tonan, tetesol ti amuto to lian tehue kapi Jises Krai tel Masiwi ti kako ma awaiakako.

Kakain leili pepai Haeu pate tuah ma salan wanen

¹²Salan amuto tioiwen tesol waliko ien ma amuto tu xoxox ti nauna ti Haeu. Tuahe pahak nga hanamena kapitini amuto. ¹³Ti nga moihin tutuen pamu ewian na nga kakane tuhi amuto lehe waxi amuto kum nam maluhe. ¹⁴Nga tioi ka tai kue ape nga mat nake Jises Krai tel Masiwi ti kako haxewa haniwen nga. ¹⁵Aile ape nga puas eliel hawane hanauamuto lehe waxi lawe amuto nameni kongini kalak na nga matewen.

¹⁶Ti amite tesol aposel kaxi hahani amuto sale aliai Jises Krai tel Masiwi ti kako hetekie pohen, kumahe amite kakaxi meng ti seilon liai tua aile tanomi. Ti tange pulamite wanen, amite ningahiwen lalape xewaian. ¹⁷Amite ien ti Haeu tel Tamakako sameni hawane i. I sohot lokon ti Haeu tel Masiwi tapein wanen ukek, “Tetel se Natuk pate nga waheni ma amuke hawane i.” (*Mt 17:5; Mk 9:7; Lk 9:35*) ¹⁸Amite kapi Krai he tetehu maunten ti lotuiai Haeu, ti amite hong tenen kakain ien ahuma ti tone Haeu.

¹⁹Aile ape kakaiamite sale puase Krai i kola hawane ka waliko ti teka kuluiai kakai Haeu kakawen se pate salan. Amuto nam waxiwa kakai alaha nake i huali amuto paxai tioiai waliko tenen salan masin ti xewai al i haxewa aweisalumuto. Ape taun ti aliai Jises Krai, i haxewa hawane lawe waliko hani amuto masin ti tehu kohot towisaian i hatapo tilokoan. ²⁰Pate tuah wanen ti amuto tioi ka waliko ti teka kuluiai kakai Haeu taiwen he leili pepaun, kumahe puki kakai alaha. ²¹Kumahe laha usiua tuahe namili seilon. Holi Spirit hanamiloa laha hakoutai kakai Haeu.

Teka woinakon hanau seilon ma kawatan ti laha uke

2 ¹Ti imat tin hina teka woinakon kuluiai kakai Haeu leilokako teka Ju. Seilon tenen ien tin i sihila kapimuto. Laha anesoke hawane

sale hanau pulutiamuto waliko tenen i haputa xoxoi namilomuto ti Krai. Laha kum nam waxi masiwiai Jises Krai, tel i mat ukei kawatan ti lialui woulaha, aile ape laha uke koseni kahulaha tenen pate lialun wanen.

²Kilan teka kahikahi Krai ususi lialui woulaha ma kak teheni kakain salan ti Haeu. ³Teka seilon ien laha kaxi hani amuto meng tenen laha tua aile tanomi nake laha pate halepean ukei moniumuto. Ti imat wanen hoi Haeu namiloiben kahui ai saun lialun ti laha ape salan wanen imuh i axi laha kawatan tenen pate lialun.

⁴Kalak puki teka engel tetan, laha kum salia kaui kawatan ti laha tahi kakai an ma aile saun lialun. Haeu tiehi kongini laha leili tesol pate tilokoan ti kaui moloan atengi ngain tapeinan ti paxai kolongenai woi lawe seilon. ⁵Teka seilon telok ti Noa, tin laha tai salia kaui kawatan. Laha kum hong waxi kakai Haeu ti Noa kaxi ahuti hani laha ape Haeu haxa akah hutomia xux. Mewenae Noa ma tepanim hua seilon kuosel ti tenen kawatan ien. ⁶Imuh Haeu tin i kahui aliake lialui woi teka seilon ti Sodom ma Gomora. I lui hatapo huohu taon ien. Kawatan ti i tunahi teka seilon ien se kolakol hani seilon waliko ti na i sohot hani teka laha tale tehitolaha hani Haeu ma aile hakila saun lialun. ⁷Tuahe Haeu hasalia Lot, tel seilon pate sawisawin. Namili Lot kawat hawane nake teka seilon ien weli xaputiai nauna ti Haeu ma laha aile hakila saun lialun tenen pate hienain. ⁸I toto leili teka seilon ien ma lawe ngain i niningahi lialui woulaha ma hongohong lialui kakai alaha ape hatesol waliko ien i hamolo hawane patun nake i se seilon sawisawin.

⁹Ape amuto tioi ka Haeu awai teka seilon sawisawin ti kawatan ape i axi tatale kawatan hani teka seilon lialun atengi taen i hiniti lawe seilon. ¹⁰Tuahe i axi kawatan pamu lialuan hani teka laha ususi isiai tupualaha ailei saun lialun tenen pate hienain ma laha wata kai hawane nenein ti Haeu masin teka woinakon hanau seilon laha sisihila kapimuto. Laha seilon ti hanasanas ma laha angiamat ailei lawe waliko lialun. Tin laha kum nomuha kak halialui teka laha toto tone Haeu. ¹¹Tuahe teka engel kum sului laha hani Haeu tel Masiwi kalak lato pamu poheian ti laha.

¹²Teka woinakon hanau seilon laha kak halialu waliko ti tap titioalaha. Laha tap namilolaha masin manihuh i tua usi isiai tupuan ma seilon tua nokoi telei. Haeu tin i aile halialu teka woinakon hanau seilon masin ti seilon aile hani manihuh. ¹³Haeu axi laha kawatan nake puasalaha i aile halialu seilon liai. Laha amuke saun ti tua to angiang ma unuun ngain hatehu. Lawe laha aile ukek ien ti laha ang akati amuto ape tenen saun ien i halialu paxai amuto ma teheni axamuto. ¹⁴Namilolaha lawe ti ailei saun lialun ti wawan hehin ma laha kum aile lioi uke waliko tenen lialun. Laha puluti teka namilolaha kumahe xoxoan ti Haeu ma itini laha hani ailei waliko lialun. Laha kuin wanen ti halepelep waxiai tenen na pahalaha. Hoi Haeu namiloiben ka imuh laha kau hawane

kawatan ti lialui woulaha. ¹⁵Teka seilon ien selewen ti aweisali Haeu ape laha usiasi aweisali Balam, tel nati Beo, tetel pate halepean ti moni. Sikole i aile saun lialun ti ukean. ¹⁶Tuahe Haeu hapuasa tok donki i kikiliwake ti kahiloloian. Haeu hanamiloa tok donki kakanei Balam tel kuluiai kakaian ape tenen ien hakongu i ti aile usiai lialui namilon.

¹⁷Teka woinakon hanau seilon lato masin kan wal tenen paxepaxen ma masin maun tenen i kum hauxa akah nake aupol kuin paxeni xoini. Aile ape hoi Haeu namiloiwon ka totonalato leili lalape tilokoan. ¹⁸Ti lato hahanau seilon, tap solian ti kakaialato. Lato hapuasa kakain ti hanasanan itiniai namili seilon. Lato kakane seilon ka ewi ti aile usiai isiai tupualaha ti ailei waliko na pahalaha. Aweisal tenen ien lato aleheteni aliake teteka laha lilioiwa saun lialun pala aoape, tetenen ti teka laha kum tioi Haeu lawe ailele. ¹⁹Lato ukek ka ewi na seilon aile waliko ti na pahalaha nake laha kumahe hahitake tenen na waliko, tuahe puki lato hahitake nenein ti lialui isiaialato. Tioi kewak, seilon i sohot unau waliko tenen i kakapiti namilon. ²⁰Teka seilon laha tioi Jises Krai tel Masiwi ma awaiakako, laha kuosel ti lialui seilon ti tehu pon ie nake Krai kapiti namilolaha. Tuahe na laha soh tuai aliake teka ailei saun lialun ma laha hahitake nenein ti lialui isiaialaha, laha ape pamu lialuan ti lokon laha tai sohot kahikahi Krai. ²¹Pamu solian ti laha na laha tai tioi aweisali Haeu nake ti laha tioiwen, ape laha tale tehitolaha hani nauna tetan ti teka kahikahi Krai hanauen laha. ²²Woulaha i kola ka salan ti teka seilon kak ukek, “Sinen ani aliake mutuan.” Ape tin teik ulea ukek, “Kalak na o kikanomiwen tok pou, i halolo aliake tinun.” (Prov 26:11)

Namiloiwa aliai Jises Krai tel Masiwi

3 ¹Teka soliai akikik ti Krai, teik pasuk ie usiai teik nga tai hanimu amuto imat. Hahuaik hanamenaiamuto waliko ti teka kahikahi Krai hahanau lehe waxi i kungati namilomuto ti usiai namil sawisawin. ²Pahak amuto nameni konginiwa waliko ti teka seilon ti Haeu teteka kuluiai kakaian hanauen amuto hetekie nauna ti tel Masiwi ma awaiakako ti tesol aposel kakanewen amuto.

³Pate tuah wanen ti na amuto tioi ka imat ti aliai Jises Krai hina seilon laha soxeni kako teka kahikahin ma laha usi lialui isiaialaha.

⁴Laha sosoxen ukek, “Ia tel Jises i ukek i aliama? Paxaiwa, i tap. Lilian ti tehu pon itan ie tanoma, tap tenen sohiawen, lawe waliko tin mamasin.”

⁵Tuahe kakaialaha kumahe salan. Laha kum nam waxi ka ti kuwen wanen Haeu tua kak ape maun aheah tan. Ape Haeu apuhini hatesol kan ape i hapake hepekeun. ⁶Imuh Haeu hapuasa kan ti hutomi halialui lawe xux. ⁷Tin ti kakaian, maun aheah ma tehu pon itan ie tua atetengi na ah lui hatapo lalu. I sohot tataen Haeu paxai kolongeni woi lawe seilon ape i halialu hawane teka laha kum nam waxi i.

⁸Tuahe amuto, teka soliai akikik ti Krai, amuto kum mamaluhe ka Haeu tel Masiwi i kum namiloi welui taun hanowi ti kaha seilon. Ti Haeu, ngain tehu masin 1,000 ahang, a 1,000 ahang masin ngain tehu. ⁹Hina seilon laha ukek ka Haeu tel Masiwi hatalia kueini aliai Jises Krai. Kumahe. Ti tataan tetan i atengi haweluwelu na lawe seilon towiahua ti lialui woulaha nake i watakai hawane na tuahe tel i mat hetekie saun lialun. ¹⁰Tehu ngain ti Jises Krai aliama i sohot hahutuia hanowi tel seilon xuxuina. Ngain tehu ien teka seilon hong lalape tangiai ah ti i lui lawe waliko he maun aheah ape maun aheah ma tehu pon itan hetekie lawe waliko i tapo kaluta hawane.

¹¹Na Haeu hatapo lawe waliko ukek ien, namiloiwa sale woumuto. Kewa amuto seilon sawisawin, ailewa saun tenen Haeu waheni amuto aile. ¹²Na kako aile ukek ien, i haxe koseni tehu ngain Haeu kilamiwen ti aliai Jises Krai, tetehu kako to mon atetengi. Ngain tehu ien, maun aheah i xek ape kekei ah i hamanunu hatapo lawe waliko ien. ¹³Tuahe kako teka kahikahi Krai, kako mon atetengi maun aheah ma xux haun ti Haeu kakawen i hani kako. Ti tesol ien seilon aile mewenae saun solian.

¹⁴Teka soliai akikik ti Krai, ti haliwei tesol waliko ien sohot, puas elieliwa ailei lawe waliko solian lehe waxi Haeu namiloi ukek amuto seilon pate sawisawin ma tap tel i pon tieniamuto ti tenen na waliko. Kewa wasolamuto Haeu pate solian.

¹⁵Nameniwa ka Haeu hatalia aliai Jises Krai nake pahan lawe seilon towiahumua ti saun lialun lehe waxi i awai laha ti kawatan ti lialui woulaha. Tin tuahe masin kakai Pol, tel soliai akikikako ti Krai, i kakanewen amuto hetekie anesoin ti i ahuma ti Haeu. ¹⁶Waliko tin tetenen ien i kakak leili hatesol pasun ti i tai hani teka kahikahi Krai. Tuahe hina kakaian pate ailan ti seilon xeu. Teteka seilon anesoalaha i tae sale puase Haeu ma namilolaha tetan kumahe pate xoxoan, laha hulo towiahu kakai Pol hetekie kakain liai ti he pepai Haeu. Puki katekatealaha ukei kawatan tenen pate lialun.

Tiliai kakai Pita

¹⁷Teka soliai akikik ti Krai, amuto tuiwen ka imuh tesol waliko ien i sohot. Aile ape kanipetiwa teka seilon laha kum usi nauna ti Haeu lehe laha kum neini puluti amuto. Na amuto hongeni laha, i haputa soliai xoxoi namilomuto ti Krai. ¹⁸Pahak amuto aile tatalewa waliko ti Haeu waheni lehe waxi pakataiamuto kapi Jises Krai tel Masiwi ma awaiakako i xox ahe ape tin i axi halapa soliaian hani amuto.

Kaha hatesol haxawawa axan ti aoep ma lian tehue. Salan wanen.